

15/05/2003

Jadilah warga berjaya dan berjasa

SEMPENA Hari Guru yang akan dilancarkan oleh Perdana Menteri, Datuk Seri Dr Mahathir Mohamad, di Pulau Pinang esok, barangkali ada guru yang merenung akan tanggungjawab mereka yang semakin mencabar kebelakangan ini. Tiada siapa yang dapat nafikan, tanggungjawab serta amanah yang dipikul guru kini semakin besar, mencabar dan memerlukan lebih banyak pengorbanan.

Dunia pendidikan sekarang amat berbeza berbanding zaman ibu bapa atau nenek moyang kita dahulu. Ia bagaikan langit dan bumi. Namun, baik dulu atau sekarang, siapa juga yang terjun dalam kerjaya pendidik, tidak dapat lari daripada melakukan pengorbanan.

Bukan saja dari segi tempat bertugas, malahan masa, persekitaran, perasaan, wang ringgit, dan sebagainya, semuanya menuntut pengorbanan. Cabaran paling utama seorang guru ialah untuk menjadikan pelajarnya, seorang insan mulia, bertanggungjawab dan sedia memberi sumbangan kepada agama, bangsa dan negara.

Sebagai pelajar, setiap sumbangan serta pengorbanan guru itu tidak akan memberi makna jika pelajar masih tidak terlepas daripada ciri-ciri negatif. Jika benar pelajar menghargai jasa dan pengorbanan guru, buktikanlah dengan mematuhi segala ajaran dan didikan mereka. Jauhilah daripada penagihan dadah, merokok, gejala sosial, salah laku, dan jenayah. Akhirnya, jadilah seorang warga berjaya dan berjasa kepada generasi akan datang.